

摘藻堂四庫全書薈要

集部

欽定四庫全書薈要

集部

御選明詩卷三十八

九

詳校官原任主事

臣

李斯咏

欽定四庫全書薈要卷一萬八千五百三十八

集部

御選明詩卷三十八

七言古詩三

陶凱

贈琴士施彥昭

君不見鳴琴無賞音伯牙絕絃仍破琴
又不見斲琴無良工焦琴終為爨下桐
大江之南多好山孤桐往往生其間
武林城中百萬家斲琴施氏良足誇
嗟哉施氏之

外無復人桐樹枯死終為薪今人好尚與古異人間雅
琴多棄置雅琴苦少秦箏多嗟哉施君將奈何

曾魯

贈黃道士還九宮山

我家羣玉山南陬君居蒙頂最上頭相望欲識嗟無由
搖搖心若風中旂君從少年慕遠遊擔簠笙鶴仍丹丘
冠星佩月露為裘口誦赤玉靈書謠摩斥八極隘九州
後天不老三光凋故鄉臨睨無停輶下視起滅如浮漚

九宮山高明翠虬真牧之子世莫傳君居其間業焚修
五十餘載無悔尤翠華昔駐鸚鵡洲承恩召對黃鶴樓
數陳屢沐天語酬大官醉以白玉甌去年弓旌復旁搜
麻鞋徑入朝冕旒神臯繁麗不肯留日夜稽首還山求
山中之人寄書招雨餘黃獨抽新苗芝草琅玕弄春柔
不歸負此巖壑幽龍江送別情悠悠鄉人歌作商聲謳

孫作

約潘元飛遊惠山

錫谷名泉誇第二江水由來勝山水中冷天畔隔蒼煙
九龍眼中老可喜我夢臨此鑒眉鬚裏茗烹煎攜綠珠
老僧毳毳妙而臞忽來說禪坐跣趺三生豈是舊緣法
明日買船當下牕共君烏紗一裹頭野岸春洲看晴鴨

唐肅

題趙仲庸所畫滾塵馬

匹馬滾塵誰所寫天水王孫最文雅王孫系宋不系唐
那識唐人與唐馬左輔白沙白於雪四十萬頭名各別

廐中此馬帝常騎一色紫霞名叱撥奚官似隸王毛仲
左手執刷右持鞚沙平草暖不被鞍芻豆飽來筋力縱
翻身倒豎踣鐵蹄霧尾風駿亂不齊元是滇池赤龍種
猶思躍浪涌春泥太平無事征戰少青絲絡頭可終老
不似交河赴敵時夜蹴層冰僵欲倒

藍仁

題鄭德彰負外所藏高彥敬畫楚江春曉圖

旭日未出羣山昏蒼茫楚江多白雲芳洲無人采蘅杜

落花飛絮春紛紛晴嵐滿戶漁家曉花枝髣髴聞啼鳥
巫陽夢斷三峽空湘渚愁深九疑小風流文采高尚書
如此江山歸畫圖平湖煙靄水空闊陰壑松檜天模糊
左司郎官何處得高堂紫翠生春色是中疑有五湖人
一葉扁舟蕩空碧

雲峯秋霽圖為方煥賦

茅屋溪頭紅樹村石梁秋水清無痕粉榆過雨鳥鳴澗
杭稻如雲山對門老翁日高睡未起穉子讀書窗戶裏

干戈如此賦歛煩雞犬晏然鄉曲喜山中酒熟黃花開
仙人候我芙蓉臺雲林今夜好明月擬跨幔亭黃鶴來
贈武夷魏士達

武夷山水天下無層巒疊嶂皆畫圖山川直疑混沌鑿
秦漢而下靈仙都中天積翠開宮殿石壁虹光夜如電
鸞鳳常驂神姥遊猿猴共醉曾孫宴洞中別有昇真天
瓊林遺蛻如枯蟬露盤仙掌千年藥春水桃花九曲船
萬松岡頭羽衣客更入三山采真訣神遊不計海天遙

夢覺長懷海天白歸來高隱萬年宮
天香時降雙青童
道參元始鴻濛外身寄虛空象緯中
嗟予久慕煙霞侶
天遣空山作詩苦清歌曾遶幔亭雲
凍筆空題草堂雨
金丹擬就玉蟾分木葉西風鐵笛聞
野老只知堯舜世
樵夫或遇武夷君

藍智

赤壁

長江西來雨如霧赤壁蒼蒼風雨暮
草木猶疑橫槊時

塵沙尚憶焚舟處，烏林渡口下舳艫。
曹瞞已料無全吳，陣前部曲奔先主。
眼中談笑輕周瑜，君臣謀合士賈勇。
玉帳旌旗亦飛動，樓櫓晴空煙焰高。
魚龍白日波濤湧，荆門牢落駐殘兵。
野曠不聞鼙鼓聲，戰骨秋埋湖外草。
捷書夜報石頭城，雄圖霸氣兩消歇。
地老天荒秋一葉，石上殘碑過客題。
沙中古劍漁人得，漢王祠枕碧山隅。
諸葛臺荒野鳥呼，千年忠義出師表。
萬里江山八陣圖。

林公慶

賦得明月樓贈孫伯融

兩溪合流涵太虛
白龍簸弄摩尼珠
玉娥捧盤不敢去
孚尹散入仙人居
仙人乘雲遊汗漫
瓊簫寥寥度銀漢
斟酌北斗依上台
玉宇珠宮露如霰
鳳臺神馭不可留
春風花開帝王州
夫容峯前舊時月
夜夜常照溪上樓

張紳

題江岫圖

烏衣巷裏東風老
蝴蝶飛來滿芳草
美人春夢隔天涯

十二巫山眉不掃
巫山巫峽江水新
煙波渺渺江南春
鴛鴦不識橫塘路
鸚鵡窗間呼向人
青綾誰共官曹宿
雪楮銀毫吮晴綠
太常春甕碧霞沉
六曲屏風對銀燭

曹介

金碧山水圖

唐朝以來畫金碧
小李將軍稱絕奇
流傳所見恨不廣
眞蹟往往人間稀
此景何人之所作
老眼揆摹看宛若
羣峯削翠撐晴霄
一流銀出丹壑初
疑武陵溪桑麻

夾岸花枝低漁郎昔日訪奇處回首但見蒼煙迷又疑
天台山桃花流水非塵寰仙人劉阮採藥去虹橋一斷
難躋攀我生胡為在塵市一見青山心獨喜拂衣便欲
歸故鄉高卧溪堂看雲起觴我酒絃我琴高山流水誰
知音

許伯旅

題林盤所學民家藏溫日觀葡萄

張顛草書天下雄醉筆往往驚羣公溫師作畫亦若是

我知畫與書法通葡萄何來自西極枝蔓連雲引千尺
世間畫者誰最高溫師自有葡萄癖當時豪貴爭邀迎
掉頭輒走呼不應酒酣耳熱清興發揮灑始覺通神靈
東家雪練西家帛布地待師師不惜芒鞋踏墨雲海翻
滿把驪珠輕一擲百年畫意誰見之破幅蕭條今尚遺
心垢都除入清淨不爾妙悟何能為憶我攜書客淮右
大官都送葡萄酒寒香壓露春甕深風味江南未曾有
林君對此心忉忉謂余亦種葡萄苗何當釀酒二千斛

愁來一飲三百瓢

題林周民山礬圖

山礬入畫古所少我昔見之倪瓚家問君何處得此本
水屋十月來春花東風著樹香滿雪長鬚滴露金粟結
一枝獨立霜霰餘已覺江梅是同列惜哉此物知者稀
深林大谷多所遺牧豎樵童爾何苦剪伐每同荆棘歸
林君本是鼇頭客高卧雲間人莫識酒酣揮袖卷新圖
一笑西山眼中碧

張適

題山水障子為蕭溪耕者賦

蕭溪先生樂山者結屋臨溪頗幽雅開軒見水不見山
却向圖中看揮灑高齋素壁懸清風彷彿坐我林崖下
羣峯奔馳勢如馬綠樹人家面平野層閣忽從天際來
飛泉遠自峯頭瀉半山雲氣千峰白滿谷霞生萬巖赭
野橋日落行人稀幽徑花開知者寡蕭溪閒居畫多暇
坐對此圖看不捨平生沉復能食力春作鋤犁躬自把

短蓑朝耕隴上雲長檠夜落書邊爔有時歸來面盟鷗
鯨吸春醅知幾竿登高或著謝傳屐帶酒何妨遠公社
臨池每解學來禽對客猶知論裏鮓醉中邀我賦長篇
老我才疎不堪寫

時銘

題錢塘送別圖

胥臺怒挾鯨濤回吳越中分天漸開青山兩岸障雲錦
瑤空萬里春風來春風先到沙頭柳柳色鶯黃映春酒

美人欲去暫停橈，折柳贈行重握手。
珊珊鳴珮行且遲，牽衣迭勸飛瓊卮。
今日不醉後，未期后夜相思空夢之。
人生最是別離苦，黯然消魂恨難吐。
平生語笑在斯須，遮莫當筵強歌舞。
海門日落潮已平，篙師掛帆催去程。
畫工難寫斷腸意，聽取陽關三疊聲。

嚴震直

棲霞真境

棲霞有真境，遠在桂林間。
春風洞中瑤草綠，桃花滿樹

春斑斑羣峰拔地幾千尺上有樓臺耀金碧興來直欲
一登臨王事有程留不得

鎰炳

燕子樓同周伯寧賦

寶瑟凝歌繞珠箔流蘓結帶黃金索翠紅香裏宿鴛鴦
春風人間無此樂杏梁塵暗麝蘭篝黛鎖眉峰掩畫樓
燈殘枕冷梨雲斷秋雨人間無此愁

題方壺畫為斯貞姪賦

巨然畫與書法同縱筆所至生秋風墨飛原氣瀉沆瀣
青摩斗角連崆峒遠岫平林斷還續苔根斜迸山泉綠
釣倚丹楓野老磯門垂碧柳幽人屋壺公騎鯨白雲鄉
龍樹綠泣煙草黃風流文采今寂寞對畫淚痕沾我裳

王蒙

登泰山

有引

余過奉高謁嶽祠見郝伯常山三詩刻於廡下明
日登日觀峰下瞰滄海塵世蒼茫青徐在衽席間

因成此詩以補郝公之所未道者云

飛仙挾我游天門足躡萬壑雲雷奔凌虛直上數千尺
適見混沌分乾坤鉅鼇左折蓬萊股鯨波東注搏桑根
地高俯瞰滄海日天近仰叩清都闕古帝何年闢下土
九點青煙散寰宇翠旂孔蓋此登封盛德神功照今古
人間瞬息三萬年七十二君何茫然秦皇漢武踵遺躅
鏤玉坎塋山之巔金宮翠陛苦不樂遣使碧海求神仙
羲和龍轡不稍貸豈料海水成桑田試向封中一回首

六合垓莽空雲煙千秋誰識當時事五松大夫知此意
巖前長揖大夫松數子胡迺干秦封高標直下魯連節
避世不及商山翁雪髯雪榦如屈鐵濤聲瑟瑟吟悲風
松本無心偶然耳人情好惡多彌縫欲傾箕潁一瓢水
為汝淨洗羞慚容為君解嘲君勿怒萬事轉首成虛空
帝子絳節朝丹穹神靈婀娜羣仙從噓呵紫燄開芙蓉
光景上屬超鴻濛玉女夜降騎青龍鸞匏鳳笙聲嗷嗷
霓裳舞袖飄長虹瓊音間作鳴絲桐白雲清謠曲未終

冷風命駕歸崆峒千峯萬峯浸明月恍惚身在瑤池宮
明朝稽首下山去翠嶂突兀青霞中

李暕

寄太平諸友

昨日東風吹雨過正值山齋罷書課無官可守真自得
有酒不飲誰能那此時況當春夏交綠盡園林安敢唾
出泥已誇籬筍嫩入饌頗憶溪魚大花間紫騮來幾匹
葉底黃鸝鳴兩個桃巖諸公多俊才遠來相就同賡和

野人擬作韋曲遊諸公忍復東山卧誰謂更深雨復作
到曉打窗驚夢破寧愁烏帽顛風吹尚恐蠟屐春泥浣
拈毫惆悵題我詩天晴更為斯文賀

贈地理遠碧山

澗東瀍西曾卜洛定之方中楚宮作當時相宅論陰陽
猶未經營到冥漠後來注意馬鬣封某丘某水尋靈蹤
封侯作相在頃刻芒屨踏遍青芙蓉遠師本有降龍技
隨處看山逐龍勢金華一郡凡幾家屢見牛眠得佳地

我家近住東屏山時與遠師相往還青囊和月挂松樹
且酌美酒開心顏我聞金陵帝王宅虎踞龍蟠出奇特
遠師飛錫宜一遊歸來說與漁樵流

九鸞圖

何人水墨開毫素白日晴窗起煙霧強將醉眼窺微茫
乃見江南九秋鸞兩隻長鳴一隻飛兩隻共啄菰米肥
其餘四隻夢洲渚黃蘆白葦相因依我家曾住苕川上
綠蓑披雨聽漁唱西塞山邊今有無桃花流水應新漲

別來幾載棲林巒身欲奮飛無羽翰卷圖高詠風漠漠
憶爾磯頭青釣竿

題煙波疊嶂圖

憶昨扁舟上南斗順風看山如馬走前山在眼後山失
紫翠繽紛落吾手當年見山如畫圖畫圖得似當年無
臨軒把玩笑絕倒蚤覺詩思生江湖江風蕭蕭煙水暮
盡是漁翁釣魚處安得身輕如白鷗江上飛來又飛去

題胡濟源聽泉樓

冷泉亭子深且幽我昔杖履曾追遊山中正當朝雨霽
坐聽泉水涓涓流初如松風灑萬壑忽如仙珮鏘鳴璆
又如蛟龍起潭窟霹靂閃電摧林丘黃猿抱子挂秋影
良久不下聲啾啾是時同行四五人相對毛髮寒飈颼
乃知福地難久住却載酒壺登綵舟故鄉一別幾十載
江湖浪跡如沙鷗風塵瀕洞箭滿眼欲歸洗耳嗟何由
飛來山色入我夢碧松丹桂枝相樛每逢泉石必宿留
題詩感慨無時休胡君亦是聽泉者胸次磊落非常儔

何當暇日登君樓與君作記樓上頭

題鍾馗移家圖

綠袍進士掀怒髯飢來嚼鬼如蜜甜酸風苦雨攪白日
移家欲住山陰尖隨兄小妹臉抹漆眼光射人珠的皪
鬼奴鬼妾千萬形蟹怪貓妖最蕭瑟勢能使鬼鬼不違
髑髏在後嗤鍾馗英雄如山堆白骨莫倚區區手中笏

青山白雲圖

若有若無青山之嶙峋欲斷不斷白雲之氤氲往往何

人得此意高公彥敬下筆藝絕倫我歌紫芝白雲裡白
雲却向青山起裁雲為我衣推山作我几松花釀酒三
千石醉後高歌歌未已歌罷仰天笑此樂人中仙心搖
赤城霞目斷蒼梧煙左執容成袂右拍洪厓肩五雲之
佩何翩翩乘風欲往蓬萊巔蓬萊巔渺何處金銀樓臺
隔煙霧青鳥銜書海上来千歲胡麻欲成樹悵不往兮
心茫茫雲浩浩兮山蒼蒼人間亦自有真樂還君之圖
兮贈君青山白雲作

題五馬圖

開元四十萬匹馬誰是超然出羣者曹韓筆力非不工
須信真龍最難寫真龍只有拳毛騶太宗騎此開唐家
雄姿猛氣世無敵當年識者久歎嗟吳興公子畫五匹
滿眼風雲起蕭瑟一匹玉花鬣且驕一匹飛黃甚飄逸
駁文殊者一匹雄一匹紫電奔長虹中央正立一匹胡
青驄遂令四馬皆下風想見承華春首著此馬由來字
天育殷紅盤袍帽紋縠奚官杖策來監牧花萼樓前風

日遲五王宴罷何逶迤乃知畫師用心苦俟我落筆題
新詩

題南山獻壽圖

將軍落筆怪且雄能寫嵯峨峯律萬仞之奇峯模糊猶
含太古色慘澹頗帶清秋容儼如蓬萊三山翠且重又
如廬山五老削出金芙蓉千盤萬轉不可測恍惚雲氣
隨飛龍下有衆澗之流泉上有偃蹇之長松松根羽人
顏色好抱膝盤陀事幽討云是南極天邊之壽星遨遊

先天後天老被以青霞表蔭以白羽葆龜游綠沼沉滄
波鹿放蒼厓食瑤草有鶴有鶴飛且鳴雪衣丹鼎隨風
輕兩鶴飄然入紫清一鶴獨立和以簫韶聲手拈雙青
童載以白玉笙上朝三十六帝京五雲仙樂來相迎玉
女投壺其聲錚錚白兔擣藥使人長生胡君欣得之喜
氣何盈盈是時七月涼風生君來飲我黃金觥酒酣再
拜求我歌須臾落筆雷霆轟五岳為之動三江為之傾
此圖足為仁者壽題以南山獻壽之佳名胡君胡君宜

愛惜我歌歌罷千金直掛向高堂雪色壁夜夜虹光射
天赤

虞堪

成都使君王季野席上次韻奉呈樽巢初菴雲
林玄素子素諸公

隱者分湖住高士雲林棲兼葭散汀看鷗去桃花隔屋
聞雞啼每同杖屨踏春堤詩筒酒榼前後提公子風流
迺相愛縷引嬋娟生靉靆纖歌細舞交驩從翠璫玉佩

花龍葱蘭亭之下暮春會飛觴列坐千載同莫訝眉山
長帽翁高談雄辨顏酡紅頽然自謂謫仙侶欲舉石象
超鴻濛丹丘子陶朱公人間歲月駒過隙不飲莫待兩
鬚成衰蓬君不見東風曉作梨花夢白雲飛來已半空

題錢舜舉畫蠶桑圖

桑中鳴琴巧如鳩吳孃養蠶夜不歇暖雨寒風惱殺人
正是江南三四月苔溪遺老白髮翁畫蠶畫葉搖春風
千金難買吳孃笑故寫生枝榭子紅

朱叔仲山水引為鄒生作

看山朝不飯畫山夜不眠西蜀書生有此過傳癖呼鐙
索酒忘青年東吳朱家叔仲子愛畫更覺入骨髓清晨
起來頭不梳快展溪藤潑秋水長年買船上會稽耶溪
雲門隨所之越人煮海競取富孰肯相逐探幽奇歸來
自喜胃腹飽磊砢崢嶸揮不了東家幘子高丈尋落筆
唯噴煙嶂小鄒生拜揖長衣裾得畫一紙七尺餘就中
貌得戴安道一丘一壑松兩株前年我亦畫匡廬還有

松巢安讀書昔年李太白最愛雲端巢焦桐不著童子
抱先生自是乘籃輿仙人自在第九疊牧豎樵夫皆可
居朱叔子鄒陽生世俗那辨闕與荆齊君不好瑟王子
自吹笙何當與子坐待海晏風塵清更作崑崙頂上行

王澤

寄友人

我本東海人家住東海頭自從卅角時便向西州遊邇
來西遊十九載夜夜思歸夢東海此身厭逐戎馬間落

魄唯存壯心在今年始欲向東還便將歸老天台山相
隨仙人養雞犬笑弄綠水桃花間况聞溪上桃已熟仙
女嬋娟面如玉春風綰髻雙綠鬟舞腰解按山鄉曲去
年羣仙遙見招謂予自是王子喬山中何嘗識酒禁日
日爛醉吹璫箭昨日纔經四明道故人相見驚絕倒間
關萬死得生還顏色還同舊時好忽聞天吳落海隅到
海要拾明月珠大風三日撼天黑海底吹折紅珊瑚洪
濤如山老蛟怒白日江臯塞煙霧仙山咫尺不得歸目

送冥冥鳥飛去
櫂舟惆悵却西回
側望仙山心欲摧
空懷帝子芙蓉闕
遙望中天兩玉臺
愁來昏昏枕書睡
呼酒狂歌不成醉
丈夫出處真可憐
往往長遭不如意
作詩為謝丹霞仙
金堂石室無清緣
有心未罷歸來約
更待秋風海月圓

趙松雪八駿圖

趙家王孫擅好書
更復畫馬如江都
嘗從玉堂罷春直
慣寫天馬隨監奴
馬來西宛龍八尺
勢或怒驚如鵲立

似疑初浴滎河波身上龍紋五花濕王孫寫駿不寫形
運思已入天機精都將臨池古書法落筆一掃千人驚
今逢此圖乃八足老我見之唯歎息人間駑馬漫紛紜
天上龍文誰購得憶昨八駿登瑤池崑崙萬里天西陲
風行電邁景恍惚翠旌不動天王旗古來八駿雖已矣
房星在天還不死雄姿伏櫪世豈無胡乃唯稱穆天子

袁舉

乙巳寒食

香風吹面東方來櫻桃花發柳眼開鸞簫聲歇幽蘭笑
十二樓前青爵叫王母騎龍愁暮雲碧桃過眼三千春
北山佳城久無主寒食心摧淚如雨自驚髮薄不勝梳
心事波搖為誰語

李延興

福源精舍

京城六月日如火風軒散髮執書坐頓嫌城市多煩囂
欲買田廬何處可素几茶甌吹碧香有客敲扉偶相過

為言越中好山水厥土膏腴不偏頗魏氏之子文貞孫
玉樹臨風色瑳瑳讀書泐水之東頭蒐今撫古以自課
夏蓋湖光白湧雲福祈山氣青浮座三江帆上暮天長
八月潮平秋水大亭邊獼猴長如人月黑林昏盜山果
桃源人家疑此是洞口雲深晝無鎖百壺滿醉江南春
擊缶高歌兒子和西蜀少陵恒苦吟南陽武侯尚高卧
文貞昔在貞觀中大節堂堂不終挫好將舊學佐朝堂
行見英風振頑懦索居何日賦歸來盡理遺書載輕舸

我昔耕牧峴山陽門前水田足粃糯十年道阻不可歸
江上秋風茅屋破舊栽松柏定成林石牆竹梢添幾箇
向來耆舊安穩無每一思之淚交墮福源林壑倘見分
卜鄰擬住山之左客歸好語伸遠君歲晚寄書煩報我

漁陽客邸

城外雲山濃似綺屋裏琴書靜如水石鑪添火試松香
裊裊篆雲飛不起天涯倦客此停驂茶竈煙銷猶隱几
奚奴呼覺日平西一片秋聲響窗紙

題畫

山翠浮空初過雨
山麓晴雲散芳渚
霧合長林生曉寒
人家更在林深處
澗泉六月翻松根
石洞千年隱仙侶
有誰共奕橘中來
無人問路桃源去
白煙遮盡青林花
野蕪嫩香應可茹
清幽不減山之陰
只欠蘭亭列觴俎
誰乎寫此怪而奇
莽莽雲山入毫楮
細看猶有遺恨處
胡不著我山之墅
我生本是丘壑姿
誤落京塵幾寒暑
小時耕牧峴山陽
間從野人學種樹
門前魚浦啼竹禽

屋上鶴巢走松鼠獨行採藥日暮歸纔得芝朮一斗許
縱令服食不得仙何若長年藝禾黍小村秋晚雞正肥
大甕春浮酒新煮老翁醉舞兒子歌笑語誼誼忘賓主
此樂不見十許年兵火煌煌照南楚思歸見畫萬感生
悵望風颿橫浦溆時清即好謝官歸全家移向山中住
辟間雜畫

山中之人氣奕奕愛畫雲山與水石遠山近山恣一揮
頃刻生絹數十尺今代只數高尚書妙處不減米家筆

後之善畫者為誰青山白雲久蕭瑟忽驚座上煙靄生

漠漠平林翠如織平生夢想不可到乃在君家雪色壁

花發窮林破曉紅水合長天蕩晴碧蘆邊鴈影落迴汀

沙上漁蓑曬斜日白髮蒼顏四老人棋罷松間坐爭席

筍皮笠子大如繖歸去不愁山雨濕爐經九轉鍊丹成

杖挂百錢沽酒喫眼看此景不可親況復憧憧事塵役

會須結屋山之阿更求好田水之側野人生理日有餘

耕歸牛角懸書帙茅檐夜火促寒機古甸秋風收晚粟

安車若便下丘樊為勸先生不可出

貝瓊

遊菩提山值雨宿存思菴

連山插天危欲崩木客結構當千層
我來看山風雨惡入山喜見靈泉僧
閉門留客共野飯風回雨絕清無蠅
酒酣熟寢喚不起夜深花落龕中燈
軒轅已恐即韓愈許記未可譏陳登
天明僮僕催欲去却歎世故來相仍
重尋曲折恐蹉跌安得遠討閑支藤
林開川豁見鳥下

山寒石峻愁猿騰呼舟獨返草堂路他日重來共毳毼
送浙省都事曹德輔運糧北上

屯田未開歲未熟白粲一金纔一斛將軍初下山東城
使者復轉江南粟颶風五月西南回黃龍朱雀一時開
雷霆夜掄海若死雲霧晝合天妃來黑洋北去五千里
直沽近接金河水內廷傳勅賜宮壺侍臣出報龍顏喜
雨中

江南正月如臘月花開未開春尚慳空中白雨急飛瀑

海上黑雲深抱山老夫閉門愁不出十日西窗聽蕭瑟
公卿韜馬五更朝且獨高眠舒我膝銅雀破瓦不補天
哦詩強學號風蟬荒村無路竹雞喚載酒何人尋鄭虔
白頭為農計亦足棄書耕田買黃犢

送迓士霖歸天台

赤城雲氣神仙家千樹萬樹蟠桃花十二樓臺起花外
石門水長通胡麻當時劉郎亦草草出山却憶山中好
莫信丹丘日月長玉人已共桃花老山空水流雲自飛

劉郎看花須早歸

題董源寒林重汀圖

天下畫師無董源學者紛紛工水石雲山萬里出巴陵
白首淮南見真蹟亂石平坡淨無土松根裂石蟠龍虎
偃蓋千年飽雪霜深林六月藏風雨江上村墟何處入
浮空遠黛蛾眉濕漁人日暮各已歸小舟如鳧落潮急
我昔西清嘗看畫南唐此本千金價坐移絕境在雲間
月出霜猿啼後夜薄遊未掛吳淞帆令我一夕思江南

安得買田築室幽絕境開窗日日分晴嵐

張宣

贈相士

桂叢始華香滿院
烝龍有客來相見
自言幼讀許負書
爛爛雙瞳炯若電
瞪予丰采誇再三
昔何蠖屈今豹變
窮官得之談笑頃
不用文場苦鏖戰
人生所貴能自知
我嘗鏡中見吾面
兩顴頰色耳無輪
齷齪低頭共鄙賤
縱如眉目差疎秀
已分半生食破研
長吟抱膝倚青天

看盡投林飛鳥倦封侯骨相豈不殊飛虎頭顱加額燕
撥灰煨芋且勿言門外秋江淨如練

游四明山

野人放浪山水情小弄雲海游四明半空下見日光動
中夜起聽天雞鳴松風濤卷出萬壑耳邊無處無秋聲
綠蘿碧澗月欲上澹煙遠岫天低橫山中招隱者誰子
相看擬和游仙行山川奇絕境復清秀色可攬難為名
安得仙人衛叔卿身騎白鹿下來迎粲然一笑白雲裏

授我寶訣教長生

錢宰

早春寄鄉中友人

故園花發春又來
碧桃半折棠梨開
流鶯踏花酒落杯
花飛落酒相縈迴
酒酣起舞落日晚
應念長安人未回
江上舟幾時發
拍手醉唱歸去來
笑摘花枝簪白髮

雲中兩烈婦

竹貞鎮雲中縱遊
兵掠鄉鄙張思孝
妻華氏偕子

婦劉罵賊死之作雲中兩烈婦

雲中兩烈婦風節何雄哉婦姑誓同死軍馬倏已來姑
言我死命之遭爾方年少不得逃欲自經不得索欲自
刎不得刀少婦潛致詞不用刀與索兒當激賊怒婦姑
頭共斫姑如湛盧劍罵賊獵獵生剛風婦如黃間弩蹶
張放弦氣愈雄厲聲奮激膺賊鋒萬古雙烈夸雲中

長江霽雪圖

昔年壯遊下江漢霽雪千峰排兩岸今年看畫憶舊遊

萬里江山入清翫岷峨岡脊來蜿蜒青城一峯高插天
東馳衡山走千里匡廬五老下與石城北固遙相連冰
巒雪壑互起伏照見日華破初旭神光混茫元氣浮奮
如巨鼇簸坤軸爛如秋空雲浩如滄海濤又如瑤臺銀
闕天上頭皎皎白月空秋毫回光下照中流水風吹河
漢銀雲起中流空濶不勝寒一洗丹碧秋漫漫山川歷
歷真偉觀來往十年游未半不如雲瀛樓上來倚欄一
夕看遍江南山

題俞景山畫山水帳

老夫索居江上樓廿年不出懷舊遊扣門下樓出迎客
但見絕壑風颼颼岱宗日觀山上頭日出未出蒼烟浮
嵩高插天太華碧峨眉青城翠欲流匡廬老泉掛白石
蒼梧水落湘江秋懸崖倚天萬山立翔鸞舞鳳蟠蒼虬
幽岑遠樹互出沒白雲不散松風收松根老樵列四五
招我共入青林幽平生游歷走不遍千里萬里窮遐搜
如何一日墮我前空翠雜沓來雙眸舉頭問客何因入

此境迺是手持圖畫來滄洲
俞君作畫時雅有山林癖
朝登秦望山萬壑千巘淨
橫臆暮上香爐峯海色秋清
上遙碧歸來放筆作董源筆
底丹青浩無迹海桑一別
三千年山月江風耿相憶
仰觀巖上泉俯看松下石
故人不見空畫圖十幅雲煙捲還客

秦淮晚泊

秦淮酒家來泊船
鱸魚一斤三百錢
船頭買魚酒新熟
却憶耶溪歌採蓮
醉來起舞落日晚
揮手彈鋏風泠然

少年不作長安客老去逢秋頭雪白興周須求渭水才
安漢園公安在哉眼花齒折竟何益好放陶潛歸去來

童冀

題胡廷輝畫梨園圖

君不聞昔年天寶全盛時梨園玉雪千萬枝君王夜入
月宮去後庭愁損千蛾眉銀橋閣道相聯絡十二闌干
倚寒玉歸來不憶天上游獨記霓裳羽衣曲沉香燕坐
清夜長流蘇寶帶懸明璫一百五日寒食節三十六宮

明月香玉環睡足嬌無力夢繞巫山楚雲碧六花散作
晴雲飛落地琮花曉無迹漁陽一夜飛邊塵六龍萬里
天西巡馬嵬腸斷埋香玉蜀道天高空白雲東歸坐歎
年華暮遙夜漫漫誰與度梨園弟子多白頭滿眼新人
不如故爾來此恨六百年花開歲歲春風前乾坤舊事
逐流水畫圖却向人間傳半幅齊紈渺蕭瑟拭眼春風
香露濕當年畫史知幾人入為君王寫無逸

和衍公約看杏花韻

客鄉不識花時節官舍蕭條如巷陌閉門猶恐迎朔風
况復看花事行樂前年又得殷師疾往往空中聞打麥
回思少年真一夢幸免泥塗陷雙脚非無萬里封侯志
膽落繩橋懸度索亦欲州縣謀升斗束帶晨趨謁方伯
坐是蹉跎四十年不知兩鬢如霜白東鄰有子早宦游
駿馬雕鞍日馳躍西隣有客亦從軍十載歸來門列戟
書生半世成何事出門却笑天地窄南北驅馳今幾年
猶喜青衫尚如昨去冬十月上燕薊朔風入懷衣縫拆

敝裘百日走黃沙縱有清泉誰浣濯平生故人幸相值
一一襟懷皆磊落四海誰非兄弟親百年同是乾坤客
興來載酒數相過如此客懷良不惡昨宵忽作鄉山夢
便欲飛書謝婁約來春玉版行可參擬約參寥同大嚼
再次衍公約看杏花

我生獨後邵康節白首黃塵走阡陌興來猶作山水游
不減當年謝康樂歸來讀書茅屋底不悟庭中雨漂麥
往年為客上湘水萬里不異僧行脚東還茗雪又十年

日夜思歸歎蕭索移舟五湖弔范蠡醺酒三高祠太伯
豈無蒼弁晴嵐翠亦有洞庭秋月白不問烏飛與兔走
自樂鳶飛共魚躍去年買舟上呂梁橫波利石森戈戟
狂吟不信風濤險浩飲只恐滄溟窄眼中往往逢故人
謾說人民已非昨去年二月到燕城官河水動冰初拆
解裝孤館深閉門塵纓未暇滄浪濯城西招提雙杏樹
聞道花開亦將落湯休妙語數見招憐我同是江南客
嗟余卧病已旬浹出門不奈東風惡西家蹇驢許相借

明日無風便如約正使飄零滿地香共拾殘英帶冰嚼
贈丹崖隱者

吾聞零陵東有丹崖山青天削出青孱顏丹梯百丈不
可得仙人煉藥巢其間丹成仙去已千載至今草木餘
清寒我來弔古訪陳迹石磴側足難躋攀上有撐雲拄
日之喬松下有懸崖噴壑之驚湍幽林野鳥作人語陰
澗或有蛟龍蟠何人結屋倚蒼翠抱琴林下聽潺湲乃
是丹崖仙人老孫子少年早脫名利關祇今五十如處

子雙鬢鵝墨顏渥丹門前種秫釀春酒屋後藝菽供朝
餐留我石上煮清茗松花落地雲斑斑我家金華五十
里失身作客天南端徵書昨夜趣歸興葉舟徑下湘江
灘弘文館深難置足神武門高宜掛冠山中草屋幸無
恙拂衣歸共浮雲閒明年花開儻相憶把酒相望興長
歎

胡奎

駕湖舟中翫月

團團三五月挂
在鴛湖東方舟
汎流光坐我青
天中低頭看月
月在水倒影姮
娥呼不起三更
露下苧袍涼恍
然濯足銀河裏
城南斗酒真珠
紅與月共醉鮫
人宮醒來月落
不知處張帆且
趁清明風

烏斯道

次韻酬范運中

讀書窗前煙草
深三年獨守荒
山陰出門駕輿
輿脫輻閉戶燒
鉛鉛不金唾壺
擊出慷慨意青
燈照見平生心

故人苦道不相見寄詩復欲招我吟

葉子奇

過磊石

洞庭五月涼氣多輕風捲浪生微渦小船掛帆不蕩槳
後船來和前船歌月白船頭大魚出天青水底懸星河
千里故人不在眼有酒欲飲將如何

管訥

墨窗為趙撝謙賦

女媧立極斷鰲足義畫之先無刻木始觀鳥跡製文字
夜鬼哭天天雨粟篆隸變化生八分行草復作何紛紛
六書古制既茫昧載籍况遭秦火焚後之作者不可數
形聲寥寥渺千古更論得法神妙間自信臨池心獨苦
君居於越文獻邦家藏金石書滿窗磨穿青州老未已
萬斛巨鼎疇能扛吳興宗人已物故浙河東西誰獨步
君今有志繼絕學砥柱中流見孤注剡溪百番冰雪光
玄霞一斗松煤香滿堂賓客看揮灑風雨颯颯龍鸞翔

我嗟塗鴉手如棘屢欲從君問奇畫君還許我載酒來
我捧千鍾勞君筆

稼村贈鄉人孫原璘

我家三里汀前住茅堂政近桃花渚學經不明欲歸耕
佃得官田廿餘畝有書盡賣買農具甘作東屯種田父
侯彊既足把犁鉏婦猶能載筐筥田中蠡稗日自除
牆下蠶桑春可取秋風禾黍既登場冬日雞豚復盈圃
全家衣食幸餘饒老穉那知有辛苦東隣擊鼓送農官

西舍烹羊祀田祖且喜征科一事無況是豐年好官府
縣吏催租不下鄉半夜無人打門戶官糧輸足私債無
一村帖然如安堵自信於焉老此身豈謂年來繫簪組
汨汨黃塵沒馬頭白水青山竟虛負羨君學稼如老農
久抱長材隱家墅奉親菽水喜平安教子書詩識今古
我今不蠶亦不耕素餐厚祿知何補幾時上疏乞東歸
白頭相尋願為侶與爾擊壤歌堯年五日一風十日雨

春江捕魚圖

玄真坊中老孫子老去今年不知幾綠蓑短短僅遮身
自小求魚足生理魚倉蟹舍小蓬門一帶編籬住江渚
昨夜青山得雨多門前三尺桃花水大家漁具都上船
水面紛然若浮蟻小兒捩柁立船梢老婦供炊在篷底
大繩屬網絕中流東船纔下西船起須臾兩船相向開
來往風波疾如駛前船得魚先上城後船回篙刺沙觜
此賓此主尚杯盤樵青已卧蘆花裏醒者尚釣醉者眠
東去西來隨所止不欠官家魚稅錢榮辱從來不干已

我家江南山水間，煙樹參差絕相似。
作客天涯未得歸，一見此圖心獨喜。
俸錢幾時當買山，小築茅堂三泖尾。
白頭方是謝官時，也學漁家從此始。

題胡長史雪舟卷

萬里漫漫凍雲黑，六花飄飄朔風急。
富春江頭行旅稀，汀鳥沙禽飢不飛。
此時先生乘一舸，擁鼻長吟篷底坐。
白鶴氅衣寒半披，東西沿洄隨所之。
須臾雪深風轉大，結纜歸來且高卧。
妻兒凍餓甘守貧，升斗不思干故人。

東方日出徵書下縣官扣門來勸駕

顧祿

秋夜

一寒一暑相推移四序平分秋最悲山川蕭條草木萎
金風淅瀝吹羅帷夜何長兮晝何促欲眠不眠歎幽獨
樓上寒更聲斷續飛蛾翩翩繞殘燭

題王叔明所畫松下奕棋圖

十日一水五日山王侯妙筆無荆關山如蒼龍騰入霄

漢表水似白虹瀉出溪潭間長松直下有巨石風雨剝
落莓苔斑兩翁對奕盤礴坐其上笑語自若終日無愁
顏飢來豈待事煙火瑤草紫芝俱可餐不知何年修習
到此地知有神仙境界無人寰我今讀書三十載抗塵
走俗猶未閒問翁不語愈覺心自恚高風逸韻邈矣終
難攀安得翁能示神異授以九轉入爐丹圖中之景果
然真有否便欲御風一去何須還

吳植

留別張孟兼

故人昔隱仙華山，高卧白雲終日閒。
我攜清都綠玉杖，相與嘯傲烟霞間。
一朝忽被徵書起，姓名直入明光裏。
清時冠帶園橋門，濟濟橫經臨璧水。
坐擁臯比三載餘，石室仍紬太史書。
平生直氣橫秋嶽，秉筆一字誅奸諛。
邇來峻擢儀曹上，千載皇風回揖讓。
要知制作魯諸生，元是傳經舊劉向。
塞予泉石是生涯，白頭受薦來京華。
相逢共醉金陵市，一官却種河陽花。
人生離會良可惜。

已覺形容非昨日馬頭萬點蜀山青回首秦淮煙樹夕
丈夫才氣古所難去去有冠冠莫彈郢筒酒熟寧辭飲
飯顆詩成得細看憐君最是知予者慷慨高歌起中夜
葛令丹砂或可求王喬飛舄還堪借他時一笑蓬萊巔
碧桃亂發東風前還將玉管吹明月叶以雲間紫鳳篇
蕭執

綠筠軒為姚宰作

綠筠陰陰翳窗戶此是姚侯讀書處搖空翡翠晚宜人

食實鸞凰曉相語稚子牽衣惜春露候卒編籬護秋雨
何當便棄人間事抱琴走覓湖山住

揭軌

題王金吾所藏徐熙秋荷鴛鴦翡翠圖

江南畫史誰第一徐熙寫生妙無敵寶軸多藏衛霍家
香匳盡貯金張室憶昨華清水殿西夜深輕輦隨風移
清香冉冉落歌佩秀色娟娟侵舞衣曉來宮闕秋風起
翠倒紅敲玉池裏不禁搖落恨無窮驚歎年華逝流水

芙蓉小苑曲江頭煙景蕭疎異昔遊披香露冷鴛鴦怯
太液波寒翡翠愁將軍留客多幽暇清簟疎簾時看畫
就中宋玉最多情秋思都將綵毫寫

白沙送別

當年小邑盛繁華疊榭層臺夾白沙竹深時聽尚書履
花密頻過相國家夜月霜明九華帳春風雪點七香車
臨水佳人拾翠羽隔簾嬌燕逐飛花奄忽草堂巢翡翠
重來勝地入蘼葭豪華一去如雲往空有寒沙對惆悵

征南駐馬立西風落日寒煙起漁唱

題孫氏遺墨軒

宣文學士吾季父草書往往追懷素玉堂多暇日臨池
方駕長沙美無度聞道尊公居豫章亦以能書相頡頏
錦囊長紙霜玉潔清醉時時臨數行雲霄恍若鸞鳳翥
風雨歛起蛟龍驤宣文已矣君未老一字可直黃金璫
山陰別後驚捐館零落狸毫并象管白鵝池冷綠苔深
銅雀硯寒清露滿吾廬兵後住江村玉堂佳帖無一存

却憶君家文獻在香奩犀軸付諸昆

河北冰泮放舟歸江南奉寄楊南宮

曉來銅雀東風起春冰凌亂漳河水郎官驚起解歸舟
一日風帆可千里侵晨鼓柁發臨清薄暮乘流下濟寧
南宮先生先我去花時想達瓜洲步尋君何處抽風帆
杏花煙雨春江南

御選明詩卷三十八

欽定四庫全書薈要卷一萬八千五百三十九

集部

御選明詩卷三十九

七言古詩四

姚璉

漁梁結屋

石梁之上姚家莊
隔溪指點山蒼蒼
飛樓傑閣非我事
翠竹老梅開此堂
新豐雞犬歸未得
韋曲桑麻如許長
三間茅屋吾老矣
攜兒擬拜龐公牀

任原

見鄉人程大

少年策馬辭鄉邑落魄天涯幾秋色鳳池昨遇故鄉人
不道姓名應不識布衣拂却長安塵相看感歎念情親
青春作客無遠近白髮從軍多苦辛以茲失路誰相顧
我向東流子南去歸夢不離滄海雲邊愁遠結青楓樹
楓樹叢林隔海天百年聚散一茫然簪纓故舊應誰在
萍梗江湖祇自憐臨岐執袂須傾倒明朝又別關山道

心隨征鴈向斜陽
愁對離憂醉芳草

江漢

題破窗風雨圖

若有人兮青雲衣佩玉玦兮光陸離爰處兮爰居左琴
劍兮右圖書輕富貴兮浮雲保厥美兮天真山房兮寥
落天冥冥兮雲漠漠雨蕭蕭兮風夜作心耿耿兮不寐
紛遑遑兮求索彼薄夫兮貪婪惟聲色兮是耽文繡兮
膏粱蓀何為兮懷慙秋蘭兮可紉吾所思兮古人寒檠

分雪案甘與君兮相親

張翥

賦得韭溪春水送張別駕

春風吹花澄海門
韭溪雨足浮春雲
碧漪分流入城去
石闌倒壓玻璃紋
使君青驄駐溪側
撾鼓官船送行色
片帆直泝五湖風
水晶宮中夜吹笛

周槩

王均章畫虞山圖

中陽山人思超逸圖寫江山用金碧滄海紅塵幾度飛
尚有人間留妙蹟層巒萬疊煙霧浮禪宮道院當山頭
浮屠屹立遙漢外危石正瞰清溪流平橋度水西林去
草屋茅亭隔煙樹童子攜筇獨鶴隨仙人背立溪橋路
前山矗矗知幾重懸崖怒瀑飛晴虹漁舟影沒汀樹遠
牧童聲斷江天空中陽妙手誰復擬咫尺依稀如萬里
仙巖有路疑可到便欲振衣凌拂水君不見吳山吳水
南海壖隨閣老人留七年紅橋畫舫姑蘇市晚稻香粳

湖上田江山千里總奇絕我昔思歸情惘然還君此畫
一長歎花外聲聲啼杜鵑

殷奎

侯叔庸同行過其故居見迎春一株

野花一株何人栽欲開未開迎春來主人歸來花欲語
欲語不語令人哀往年看花年正少花前把酒花長笑
妻能歌舞妾能彈門外催租無吏到二十年来院落空
兔葵燕麥競為容墻角一叢憔悴煞年年無主泣東風

今日歸來君不住君今又向何州去上林騎馬聽鶯時
慎勿長忘故園樹

表華

拜石壇

眉山三蘇宗儒宗長公矯矯人中龍南遷僭耳西赤壁
文章光燄起洪濛快哉之亭雪初霽領客登覽山川雄
自云平生不解飲胡乃一舉觥船空和詩寬限見真率
鑿崖題石摩蒼穹功名富貴一丘土斷碑殘素傳無窮

吁嗟異物神所衛玉山合璧俄相逢奎章博士丹丘翁
江南放逐驚秋風見之即下米芾拜二顛癡絕將無同
築壇山中加愛護樹以松桂連椅桐雨窗雲戶濕寒翠
朝闌暮檻開青紅白野御史龍頭客青年獻賦蓬萊宮
戲將禿穎寫螭匾斲股流星虹只今風塵暗河嶽
王侯第宅皆蒿蓬牙籤玉軸映竹素好事獨傳吳顧雍
婁東朱珪鐵作畫字字玉屈蟠蚪虫嗟哉昔人今已矣
慘澹故國風煙中如何二子復嗜古策勲儒墨收奇功

我來再拜重太息蒼蒼古雪吹長松登壇絕叫浮大白
酒酣目送孤飛鴻

申屠衡

周玄初祈晴詩

寥陽之闕天皇帝居百靈拱衛羣真趨羽人神遊尻為輿
招搖御氣凌空虛九闕洞啟光懸珠綠章封奏人間書
吳田潦淫三月餘吳淞決防連具區春苗蕩溺無遺株
吳民業業憂為魚上天好生哀冥愚羽人稽首帝曰俞

廓除霾曠開天衢蛟龍伏藏黑蛟誅有秋芄芃還土腴
人無菜色國有儲羽人有道神明俱手持玄綱旋斗樞
紫雲為舄丹霞裾蓬萊清都隨所如琳宮載敞虞山隅
為予分駐飈輪車

徐達左

秀野軒詩

春風十里翡翠屏玉遮對峙蛾眉青清泉白石雜花竹
天放畫圖鍾地靈高人開軒當此景酌酒賦詩白日靜

四簷風作翠濤聲
八窗簾捲晴霞影
我亦托跡耕漁間
結屋讀書湖上山
抱琴訪子從茲始
布襪青鞋相往還
陶振

送章彥德遊錢塘

錢塘之地何雄哉
秀壓玄圃超蓬萊
大江如龍天際起
山從佛國西飛來
雲間三百六十寺
合丹凝紫開樓臺
湧金門前浪花白
好峯兩點青如苔
宋朝文物已草莽
荒碑遺碣高崔嵬
黃龍白虎消王氣
金鳧玉鴈飛寒灰

鷗鷺浮江去不返渺渺萬里雲濤堆吾生守拙門不出
結屋低傍山之隈會稽未及探禹穴赤城未及游天台
每懷此地不得到矯首遐望空徘徊君今遠游別我去
南風十幅蒲帆開望湖樓前吹鐵笛冷泉亭下傳菰杯
問君此去何時回安能西子湖頭放歌逐君去一洗胸
中結轡之塵埃

題聽雨樓

一年過京口帆飛疾如走半江疎雨隔篷聽瀉下驪珠

三百斗一年過漢陽雪山翻怒龍黃鶴磯頭泊船佳醉
聽秋雨眠西江一年過東海急雨亂洒船窗外洞庭帝
子鳴鈞天蓬萊仙人鏘玉佩今年過長洲故人邀宿聽
雨樓玉山顛倒恍然醉一笑使我消離愁公本挈雲夫
我亦聽雨客明朝天晴當奮飛萬里天風振鵬翼

陳璧

題彥臯莼軒

芙蓉花落冷烟雨鯉魚風生紫莼渚軒前秋容浩無主

江人倚櫺煙中語纖莖採香光漉漉冰絲齊穿水晶綠
純有羹菰有米綵衣捧壽阿母喜平生宦情一杯水

史遷

茵子詩追和楊廷秀韻

松花岡頭雷雨急坡陀流膏漬香汁新泥日蒸氣深入
穿苔破蘚釘戢戢如蓋如芝萬玉立紫黃百餘紅間十
燕支微勻滑更濕傾筐盛之行且拾天隨杞菊謾苦澁
採歸篋之脫巾笠桑鵝楮雞皆不及嫫姑天花當拱揖

鹽豉作羹炊玉粒先生飽飯踏曉日更遣樵青行負笈
莫士安

洪武丁丑春題王叔明湖山清曉圖

青山屏列水涯畔白雲繚繞山腰半分明曉色澄素秋
顛倒湖光接銀漢江霞滅盡海暎生巴雪消多沔冰泮
岌業巔崖高莫梯回合源泉淨堪盥天遠匡廬秋杳冥
雨足沅湘春瀚漫濃於藍汁可染衣赭若童顛未加冠
盤谷繚通百折深緱嶺危撐半空斷澗橋陰合踏新涼

渚閣香凝坐平旦短屐扶藜野興濃輕舸聚網波紋散
南灣農鄰猶閉關西崦人家未炊爨僧寺樓臺松滿林
漁屋軒窗柳遮岸陶令秫田誰為耕邵侯瓜地親將灌
種桃莫問武陵津采芝偶得商山伴書封雁帛感蘇卿
鱸斫鱸絲羨張翰濯纓欲待滄浪清挽衣空歌白石爛
樹樹巖花嵐霧重葉葉汀蒲水風亂蛺蝶暖依芳草飛
鷓鴣晴入叢篁喚荇藻翻容避釣魚杉枿不借尋巢鸛
辟帙芸枯粉蠹生岫幌藤穿蒼鼠竄翠隨梧桐借翦圭

幕結絲蘆愛垂幔米家尚存書畫船吳綾不減錦繡段
人來西北淹壯遊地擁東南隔奇觀標靈顯秀環故居
汎影浮暉在吟案誰能高深故不競我為登臨每無憚
當時對景直彷彿逶次圍闌舊凝翫丹青物色眼停瞬
鐵石心腸顏為汗踪跡頓忘今昔非記憶方驚歲年換
半生自笑不歸去兩足其如有羈絆泉石膏肓百慮增
塵土心胸一朝澣湖山如此慰相思天地茫然寄長歎

吳文泰

送何子方還吳中無簡一二同志

城頭烏啼朝日黃城門送客歸故鄉邊風吹沙道路長
南登雁門踰太行顧我垂老不得將蕭颺短髮垂秋霜
為君北別淚霑裳歸心遠逐浮雲翔吳山崢嶸牛斗旁
五湖浩蕩烟波蒼故園桑梓連崇岡萬里愁思何茫茫
君家田園亦不荒歸來此樂殊未央兒女歡笑羅酒漿
遠行辛苦憂俱忘故人若逢滕與梁為言思君愁斷腸
勸君莫辭酒滿觴來宵見月遙相望

有懷義興崔同仁

日嫋嫋兮涼風山中人兮何所羅軒兮夜月薜牆兮秋
雨丹桂發兮巖阿荷花落兮江渚我思君兮不來望南
山兮延佇

凌雲翰

題鍾馗圖

湖風吹沙日欲昧官柳搖金梅綻蕊終南進士倨然起
帶束藍袍靴露趾手掣硬黃書一紙若曰上帝錫爾祉

蝟磔于思含老齒頤指守門茶與壘宵放妖狐搖九尾
一聲爆竹人盡靡明日春光萬餘里

趙大年蘆雁圖

平林帶烟波渺渺風低葭莢秋聲小望中疑是彭蠡湖
十百為羣盡陽鳥楚天未雪無雨霜南來豈必謀稻粱
哀音若訴雲路迴老翅不厭關河長汀洲水落成平陸
散亂鳬鷺聚沙曲低飛不肯伴寒鴉猶繞荒村破茅屋
屋中有客揮五絃從之不得心茫然何人圖畫能著此

趙氏丹青稱大年徽廟元年頒鳳歷此圖正是當時迹
便從宣和到靖康艮岳禽聲起秋夕古往今來幾盛衰
摩挲老眼竟成悲良工心苦人莫識似寫周宣鴻雁詩

包山翫月次翟宗吉韻

昔我曲江觀怒濤越山不及吳山高如何古有任公子
一釣乃能連六鰲我今杖藜尋翠麓地有白雲人不俗
丹房火冷碧窗虛夜半秋聲撼林竹踏歌連臂下仙壇
目斷西山吳彩鸞桂花飛簾作香雪轉首便覺秋闌珊

人生歡樂難再得始信光陰如過客陶令空披漉酒巾
謝公謾著登山屐菴前堵牆如白虹洞門不掩來江風
分師半席師已許經筵蠟燭搖秋紅郊何為寒島何瘦
新雨能來寧論舊今宵爛熳得好晴知是何人補天漏
少壯而老理則常胡能不死彫三光放魔西巴誠不忍
歌鳳接輿母乃狂茲遊可繼五君詠祀事同陪匪乘興
中庭坐待明月來樹影團團一時並

關山雪霽圖

前峯後峯雪糝糊東村西村春有無快雪時晴入佳想
况復見此關山圖關山迢遞相聯屬玉潔珠光眩人目
扶桑飛上金畢逋暗水流漸度空谷野橋行過路三叉
青旗插檐沽酒家驅驢倦客得少憇悵望遠道還咨嗟
詩翁好事常起早天寒祇恐梅花老柴門時有故人来
階下白雲須用埽此圖一日落塵寰筆法依希荆與關
人生遠遊固云樂何似在家長看山我本識字耕夫耳
占祥便作豐年喜田園歸隱會有時麥飯飽餐茅屋底

陳居中進馬圖

明王慎德蠻夷賓尺天寸地皆王臣遠人重譯貢龍馬
流沙萬里來麒麟金丸聲動佛郎國寶劍氣接明河津
不知何年離榆塞但見此日朝楓宸毛騶生來玉琢鼻
錢驄隱起花攢鱗最後赭白信無敵如此丹青疑有神
騰驤欲飛使者喜控制不得奚奴嗔我聞陳閱善匠意
無乃韓幹為前身按之圖中得所似惜哉世上遺其真
驪黃牝牡不易索九方臯後知何人

趙宜生

追次楊鐵崖題顧仲瑛玉山草堂春夜樂韻

畫堂燭影搖春紅錦衣公子新乘龍
朱絃初障黃蜂蠟彈破桃花紅
指甲玉脂泣金鳴雁烹鹿鷄馬乳
開瓶罌衆賞笑接杯流行春風吹動雙垂纓
哀絃要眇驚促柱短曲新歌送賓主
拍手催歡小娃舞偷看梨花帶春雨

張時

匡廬精舍圖

魏哉江上之廬峯東南諸山無與同丹梯石磴杳難度
層巒疊嶂相爭雄涼飈翻空吼霹靂風光射日開芙蓉
香爐沉沉紫煙裏瀑布上與銀河通九江秀色在指掌
五老雲氣長鴻濛我昔壯游事歷覽秋濤滿耳來松風
星子灣頭蕩輕楫石頭渡口聆晨鐘今日披圖倍悽愴
信知此樂難再逢賢哉公孫慕高隱結廬正在山之中
詩書滿架恣探討雲林對戶蟠心胃幽禽引雛白日靜
老鶴叫月秋林空只今公已嚮時用故山可望不可從

繪為丹青揭坐側傳示藝苑無終窮

袁宗

題美人春睡圖

東風小院闌干曲滿地梨花浣香玉金窗晝靜燕初開
火養沉煙一絲綠美人消瘦桃花肌春腰玉減一尺圍
碧紗帳小蟬翅薄睡損舞裙金縷衣綠雲盤盤堆枕重
翠滑斜偏小金鳳啼殺流鶯喚不醒風流政作江南夢
檻前芍藥吹幽香隔花玉漏聲正長冶情蕩漾收不得

誤隨蝶過東家牆東家牆裏新粧女兩兩三三宣笑語
西亭昨夜爛張筵燭膩銅盤照歌舞

劉璉

白楊河

白楊河下春水碧白楊河邊多估客東風二月柳條新
却念行人千里隔岸上居人纔數家茅茨深處見桃花
小婦河邊汲新水老翁門外看雛鴉桑苗未青麥苗綠
牛羊散落村墟牧行客年年任往來居人自住楊河曲

遣悶

天光沉陰歲將暮客子驅車逐歸路塞鴻叫入吳江雲
野鳥對立枯桑樹茫茫四顧少行人枯蒼之山渺何處
愁心如水水復凍焉得滔滔向東注

謝林

潁城鳳凰臺

鳳凰臺臺何高野雲黃葉風蕭騷不聞孤鳳鳴但見烏
雀棲蓬蒿梧桐摧折傾舊巢鳳兮何處翔赤霄無由再

覩分使我心勞

孫黃

閨中聞子規

交疏日射房櫳曉
碧樹初聞子規鳥
驚回殘夢了無歡
慘切清愁破清悄
獨宿何曾下繡帷
寧勞勸我不如歸
鶯花爛漫江南道
好向遊人醉處啼

贈皇甫隱士文遠

羣英濟濟登廟堂
無復幽人卧空谷
胡為冠帶隱塵市

有似山海遺珠玉先生風度與人殊面如頰王仍禿鬚
侯門不掛一步脚厭殺人間咕囁儒蔣陵白下清溪曲
垂柳疎疎數椽屋芸窗磊落一萬卷客去自倚風軒讀
秦淮買竹起高樓興來酌酒樓上頭科頭舉白亂浮客
胡琴羌笛聲啾啾朋賓自飲還自散先生醉眠忘早晏
蒲葵巨扇醉不醒人定鐘闌始知飯沉酣本以陶性靈
有時兀坐還惺惺屯蒙火足金母嘯卦氣白白升黃庭
看君出處有妙策為人不遷亦不激隨時無怪互隱顯

意欲不遣人人識我作初交沈逸民卜居遂與先生鄰
雪中長跼東郭履花下時掛淵明巾生平落落人少喜
先生一見便知己非因性情酷相似安得顛倒能如此
居安食飽即為家山林未必強京華君不見西湖處士
骨已朽至今惟有寒梅花

贈闕元帥景熙

君在前朝帥東閩虎符三珠秩二品轅門裨將懸金章
黃頭奴子州縣尹楊僕樓船下瀨時君隨左相入京師

端門萬錢宴珠履輦路千花明錦衣天官宗伯司邦典
藻鑑論君第高選君言下國羈旅臣生來好武文筆淺
願綰銅章佐北征還來作吏錦官城宣勞豈言爵高下
貴在晚節完虛名歲華荏苒容鬢改朋舊飄零滿湖海
星辰霜木餘幾人我與蟾溪老高在前年佐縣淮山陰
今春待詔入詞林比來奉節領祀事會面錯愕驚愁心
那箇新酒凝寒翠清夜懸燈共君醉醉來自起彈鳴箏
一曲清歌數行淚有歌有酒君莫辭人生會遇信有時

百年莽莽任所適不必借箸籌前期但憐奔波稀會面
此去何時復相見明朝掛席下瞿塘我似伯勞君似燕
戲贈端孝思

君不見長安遊俠兒銀鞍白馬青春時朝出呼盧夜飲
酒美人娟娟照窗牖若為君作梅花仙不隨桃李爭春
妍臨流自敞書畫軒獨夜可憐邀月飲一春長似背花
眠

往平原別高彬

銀壺綠酒沾春宴環珮朝回奉天殿平生不作兒女悲
獨向高彬淚如霰高彬昔年桑梓雄好賢乃有古人風
東林詩社靜來結北海酒樽長不空竭來弓劍已蕭索
短髮如絲猶好客塞上葡萄火齊紅宣州梨子鵝兒白
沉綿不獨重相知文采今還勝昔時小樓焚香每讀易
淨几把筆常題詩今晨我作平原別高彬不意情欲絕
芙蓉香冷不堪贈楊柳枝黃未宜折龍灣江口石城頭
一幅蒲帆萬里秋暮雲紅樹儻相憶應有音書慰別愁

寄訶林長老明靜照

龐眉老僧無住著不問山林與城郭談禪到處即跏趺
白晝天花如雨落心知一境萬緣空靜與晴霄海月同
錫振春山常伏虎鉢含秋水自藏龍問師今年僧臘幾
手種蒼松舊松子松身已作蛟龍鱗定中一念猶未起
白石垂蘿淨窈冥爐香一炷兩函經澗猿時擎野果供
山鬼或倚寒巖聽荷為袈裟荔為帶世人見者皆再拜
師言是恙有漏因我今已入無色界十年奔走亂如絲

對榻空論不遂期每歎道緣與世淺惟師與我最相知
贈虹縣顏景明

淮揚老人讀周易風吹鬢絲人不識興闌移席傍寒梅
雙眼如貓對花碧天風毛骨江海仙偶來花下同清緣
凌雲文采鳳凰見照室丹光龍虎全清琴調古無人續
且可開樽掃茅屋胎禽起舞和雲謠山月光於畫樓燭

次歸州

歸州城門半天裏白雲晚向城下起市廛架屋依巖巒

婦女提罌汲江水巴山雪消江水長城中夜聞灘瀨響
客船樹杪鉤石稜漁父雲歸晒繒網家家蕪田山下犁
倒枯大樹燒作泥居人養犬獲山鹿稚子縛柴園野雞
楚王臺高對赤甲四時猛風長颯颯柁工鳴板避漩渦
檣聲搖上黃牛峽

發忠州

顛風翻山雲黑黑星河無光江翕翕搖船夜半發忠州
漩深浪緊船欲立宣公祠下灘嘈嘈船頭著水低復高

石稜割裂箕斗影山鬼出雜魚龍號亦知風水莽回互
王事有程那得顧誰歌太白蜀道難和我靈均遠遊賦

下瞿塘

我從前月來西州錦官城下十日留回船正值九九節
巫山巫峽風颼颼人言灩澦大於馬瞿塘此時不可下
公家王事有程期敢憚微軀作人鮓人鮓甕頭翻白波
怒流觸石為漩渦柁工敲板助船客破浪一撇如飛梭
灘聲櫓聲厯亂聒緊搖手滑櫓易脫沿洄劃轉如旋風

半側船頭水花沒船頭半沒船尾高水花作雨飛鬢毛
爭牽百丈上崖谷舟子快捷如猿猱攬船把酒聊自勞
因笑輕生博奇好吟詩未解追謫仙天遣經行蜀中道
巴東東下想安流便指歸州向峽州船到岳陽應漸穩
洞庭霜降水如油

捕魚圖

小孤舟前春水綠泛湖小船如小屋白頭漁父不解愁
往來捕魚湖水頭得魚換米納官稅妻孥衣食長優游

大兒十三學網罟小女七歲能搖舫江口賽神夜吹角
村邊賣魚朝打鼓雨來維梢依古岸風起鳴榔入長浦
荻芽短短桃花飛鰕魚上水鮓魚肥鱸魚燒笋醉明月
蠻歌唱和聲咿咿月明在天光在水但願年年只如此
無風無浪常安眠湖中有魚魚得錢

武昌別魯侍儀舍人文濬

嘖嘖復嘖嘖人生交契真罕得我居翰苑君儀曹幾載
相聞不相識君名早已播南衢出入金門早奏書不謂

同乘建業水還來共食武昌魚武昌魚肥春酒好竟日
流連得傾倒黃鶴樓頭葉亂飛金沙洲上秋將老狂歌
謔浪清致同看君更有古人風才如關西楊伯起氣似
城東陳孟公相親未幾還分手可憐新知樂未久君隨
征鴈入巴陵我挂雲帆沂川口歸期去去各悽然今夕
星河各一天秋晚還期來促膝與君同賦遠遊篇

秋風

秋風淅淅吹江亭汴河之柳猶青青黃姑東渡會七夕

白帝西來朝百靈
初開琪樹已云落
遠別客愁今未醒
欲寫鄉書寄南雁
故園萬里天冥冥

李德

秋情

蠟炬搖紅紗隙凍
沉香帳底鴛鴦夢
芙蓉波冷薄霜凝
一夜離鸞憶單鳳
梧桐金井啼曙鴉
夢郎封侯歸妾家
開門自掃枇杷花

送友人

關雲櫛櫛吹沙黃瑤華拂劍春風香鵝黃淺泛玻璃光
越妓舞衫金縷長江津白白黃灣月神魚撇波龜甲裂
湘娥凝綠染春衣踏踏青雲郎馬歸

黃哲

遊泰山

今年初出承明班折腰從政青徐間神州二月新雨霽
我來萬里觀名山名山泰岱連雲上鄒嶧徂徠鬱相望
晨霞彷彿見丹崖旭日曛曛射青嶂羽服逍遙山際行

垂蘿磐石漸迴紫喬樹千章寒谷秀陰泉百道曉虹明
玄都太古瑤壇在石室丹爐長不改中林迢遞躡天門
五色芙蓉耀光彩東極羣真鳴珮環招搖玉女開金闕
蒼龍飛去溟海闊黃鶴下唳清風還奎壁祥光生縹緲
日觀扶桑擘昏曉登臨今日九州同顧視寧論萬山小
名岳齊天天不知齋宮虔潔閱靈祇寶鼎椒蘭騰馥郁
芝楹華蓋仰葳蕤詞官祝釐朝擊鼓玉童吹笙雙鳳舞
魯禘秦祀變浮雲后土精靈夜相語功成世世來登封

明堂駿奔朝岱宗翠華行處入歸鳥
樛木盡亞隨飛龍
微茫玉檢無人識綠雲陰洞秋聲急
但聞松喬遺素書
我欲因之蛻凡骨絕頂玄芝應再生
神遊早願拋塵纓
笑騎蒼猊驂太乙稽首銀臺超上清

王彥舉聽雨軒

輞川給事才且奇自我相親童冠時
高談甚愛風雨夕
世上閒愁都不知幾回共酌東軒裏
正值蕭蕭滿人耳
當牕滌筆寫黃庭涼聲散落鵝池水
竹外淋漓芳砌寒

簷端飛洒落花殘先生擲筆向予笑如此宮商真可懽
况復交游盡文雅傾倒對之情不舍銀觥夜酌涼葡萄
琵琶嘈嘈急如瀉先生醉坐銀燭低行雲入簾花氣迷
咭咭屋角聞朝雞出門只見花成泥當時雄筆誰更好
孫公狂歌君絕倒橫眠三日醉復醒夢見池塘生春草
一別淒涼十二年關河風雨隔幽軒懷鄉淚逐燈花落
隱几晴忘春溜喧君入蓬萊獻三賦我踐泥塗走中路
歸來相見頭總白坐上逢人半新故西牕舊話誰與傳

思君昨日空迴船
綠蓑青弱重來訪
莫厭連牀終夜眠

扶溪春望

溪頭望春春色深
美人不見勞予心
綠波渺渺向南浦
罨畫樓臺芳樹陰
天涯滿目丹青障
春日春花兩搖漾
翡翠蘭苕不可思
鴛鴦桂樹長相望
相望相思雲路遙
金塘流水亂春潮
採菱風急桂舟晚
疑是當年楊子橋
橋邊楊柳青青好
惆悵春心被花惱
浦口迴船欲訪君
相思一夜蘼蕪老

林鴻

寄王六校文兼似吳二太守

京師三月春雪飛雪後餘寒添著衣曹官祿薄酒苦貴
一飲百錢恒不醉忽然停杯憶鄉里美髯校文最知己
作詩判不讓高岑醉後狂吟狂欲死有時忽得意竟上
金雞山彈琴酌酒送飛鳥心比白雲閒更閒虎頭巖前
柳拖地龍池溪上花滿灣醉歸騎得將軍馬城上烏棲
門未闕白頭太守別來久別後還能相憶否詞賦終為

紙上塵功名不及杯中酒芭蕉葉長近何如前日人來
不寄書莫言閩海少飛雁何事秦淮多鯉魚

過高逸人別墅

識子何不早見子即傾倒世人意氣不相合顏色雖同
心草草子有園林東海濱香名滿耳人共聞梁鴻避世
身不仕孔融愛客家常貧茲晨飲客青山墅新壓葡萄
酒如乳綠樹穿窗鳥當譌紅條拂地花能舞醉來興逸
無不為投壺擊劍仍彈碁人生得意有如此世上悠悠

那得知

賦得獨樹邊淮送人之京

君不見秦淮水流東到海淮邊獨樹如車蓋九月微霜
赤葉乾枯枝颯颯鳴天籟枝上啼鴉散曙煙枝頭殘照
咽寒蟬離人留飲停車騎俠客相逢掛馬鞭南國高僧
從此去駐錫雨花臺下路一飯淮邊洗鉢時六時晏坐
祇園樹野鶴孤雲任去還禪心不道別離難山中亦有
長松樹待爾青青共歲寒

浦源

贈別沈校書

與君昔相逢花開酒樓醉春風平生車馬願與共何意
事變分西東君卧東山裏我釣西江曲幾回楓樹夢中
青千里桂枝愁處綠飛燕翔鴻徒往來音書不寄使人
哀返照斜分遠行路浮雲亂繞舊登臺今朝復見蘭陵
道細雨微煙濕芳草別離惆悵十年多我少朱顏君已
老握君手與君吟感君知己復知音我將歸去重回首

雲海蒼茫情更深

送王濟民歸盤谷

官亭酒香柳花白
下馬持觴送行客
客歸江上愁更多
春水雨中生綠波
青山遙對揚子渡
殘日微明廣陵樹
渡江酒醒傷別離
夜半舟人歌竹枝
烏啼月落梅天遠
驛程已過淮陰縣
楚鄉菰米飯食魚
宵征在鞍宿在車
中原漸近太行麓
不知何處通盤谷
一徑縈紆萬壑深
始知舊宅隱雲林
昔年泉谷渾無恙
猿鶴猶存松桂長

遺老家家懷故情相邀雞黍話平生尊前不問宦遊好
只說山中農事早數畝何須負郭田郡中太守正求賢
知音不肯入城市日逐漁樵向山水江南故人那可逢
有書應寄南飛鴻

黃玄

秋夜聽谷大彈陽春白雪遂歌以贈

昔聞歌白雪未知絃上聲看君彈來秋月下十指如度
春風鳴初聞飄飄下天闕亂逐回風氣騷屑凍來深樹

梅不開散入空林竹應折又如紛紛江上來流音中節
渾相催灞陵一日幾人度剡溪半夜孤舟迴清川帶寒
流野鳥絕繁語少女歌殘葉共飛仙郎唱罷花能舞須
臾雪晴風亦遲按絃問君君不知聲殘響絕無所見惟
見桐枝秋露垂

周玄

賦得河橋草色送高大歸龍門

江頭微暄冰始開河橋一夜春風來傷心宛似叢臺下

青青草色青如苔二月三月青門道積素浮光不堪埽
酒幔煙中望却無釣磯水畔看還好橋上蕭條人幾家
芳洲漠漠楚天涯暝隨斷梗飄寒雨晴逐遊絲映落花
龍門還家孟諸野清樽惆悵河橋下臨岐盡醉歌送君
草上片時駐君馬

趙迪

分得九仙觀送劉司務之天官

青山一逕連花竹瑤宮瑯館依林麓昔云兄弟九仙人

跨鯉成仙巖下宿仙人一去竟不來
落葉行跡空蒼苔
石窓無人白雲冷
藥爐有火芙蓉開
春林不辨武陵處
陰崖尚憶瑤池路
仙樂時聞太乙宮
翠禽聲起勾陳樹
鴉浴池邊日未斜
洞門流水秦人家
湖光占處知殘雨
山色晴中見落花
朝來送君即傾蓋
離筵適與羣仙會
仙人吹笙期子來
碧桃花下應相待

劉韶

王孟端畫為吳世馨作

西風蕭蕭蘆葉黃煙波萬頃萼鱸鄉延年季子幾年別
夢中歸鬢點吳霜鳳凰池上青雲客每寫滄洲只盈尺
長空一色楓葉丹老雁羣翔秋月白城東官舍少人過
枕前昨夜秋意多篝燈起坐不能寐手拂蒼苔牽女蘿
黃金築臺天際起遙望江南數千里歸心便欲付微茫
并刀休剪吳淞水

錢鼎

題湯士為孟揚作山水圖

龍門漫士真逸才，胸中丘壑何奇哉。嵐光晴翠海天曙，
出雲金碧芙蓉開。遙看幾處煙中樹，云是王喬清隱處。
萬壑松聲客掩扉，數峯花雨僧歸寺。故人文學似前賢，
結屋棲遲今幾年。多情遠寄山中興，直廬天姥應徒然。
我亦平生愛山者，聞說茲山莫能寫。清風邈矣不可攀，
蘿月雲泉夢良夜。

王彛

瀟湘歸雁

蘆根寒晚雁唼喋沙觜無人星靨靨聞有數聲何處來
相呼忽動風中葉雙飛不復過衡陽翎間猶帶橘洲霜
歸來影落碧莎冷愁山一夜攢瀟湘夢裏湘天初積雪
白溝河上琵琶咽猶見當年舊節旄幾迴拂向穹廬月

朱澤民秀野軒圖

古苔十畝青山麓窈窕幽華映深竹中有高人畫掩扉
裊裊藤梢上書屋清風出谷洒秋香返照穿林破春綠
不省睢陽畫裏看曲路經丘杖藜熟

徐尊生

送宋君諤還明州

勞勞亭邊楊柳青
新裁白紵歸衫輕
我情頗似楊柳亂
君意已逐浮雲行
一日相逢尚難別
何況同居兩三月
君歸未久我亦歸
歸家莫遣音塵稀

梁寅

簣谷作

老樹山橋畫瀟灑
興來濯足蒼藤下
雲邊厓石危欲落

雨後泉流急如瀉客過松林貪翠陰農分稻苗散青把
桃源風土良可樂何恨龍鍾在田野

王履

華山西北夾路荷花傳昔因崩陷故水聚荷生
池蓮井蓮俱無徵上峯下峯空復情山崩地陷忽露形
爛湯化作干娉婷水晶之宮秋眇冥綠娟紅膩琉璃屏
俊驢健僕風泠泠欲行不行杳難名漢臯洛浦方合并
野人解唱江南聲

曾尋落雁峯不知所在疑卽南峯異名

呼吸通帝座峯指落雁尊我已極其高不見南峯鄰南
峯之上天可捫清都有無我未聞忽聞征雁急縹緲注
目送入南峯雲

陶宗儀

題趙魏公秋林曉行圖

疎林慘淡月欲墮嫋嫋哀猿啼一箇橋危霜重白於銀
蹇驢行澀輕蹋破魏公人品世莫儔平生快意居庸游

戲將丹青寫八法西風黃葉江南秋功名到手辭未得
玉帶金魚疲峻陟他年解印賦歸來濯纓亭下鷗波碧
題李州銘所藏毛澤民山水

竹雪子能畫山醉來解衣盤礴羸筆力甚似荆與關版
堦橋西懵懂樹灰堆峯前鴨嘴灘夕霏翳壑氣映靄春
瀑出澗聲潺湲遠岫離離斷復連湘娥綰結風前鬟若
非子真谷口宅定有太乙玄都壇竹雪子玉筍班面帶
河朔氣態度美且閒鳥跡印沙文錯落蝸涎行壁勢為

環物物本然具畫理妙處豈在鐫琢間脫畧畦町掃邊
幅八法默契烏絲闌寸楮片縑亦可愛令人只尺思躋
攀此圖忽落李君手時復把看多歡顏老余撫景感真
游清盟題詩卷送還

題江山萬里圖

滾滾長江出全蜀一派波濤瀉寒玉天設巨壑鴻濛先
厥德靈長紀南服濫觴岷松畧巴梁分源崛峽走豫章
吐吞洗滌引沱滙包括洞庭納鄱陽玉壘峨眉兩旁礪

石鏡武擔連劒閣合江西頭萬里橋漢使入吳曾駐泊
丈人拔地高青城翠浪起伏勢東傾雪山去此知幾許
一覽如隔芙蓉坪丞相祠前森老柏支機石在君平宅
浣花溪碧草堂幽越王宮殿成狼籍中巖林泉嘉處多
相傳嘗棲諾詎那慈姥老龍亦共止巖阿小寺埋薜蘿
渡瀘亭對諸夷路尚疑果從何處渡魚復浦中八陣圖
前後縱橫經緯布灑灑髮怒莫嬰黑石獐惡茶槽并
巫峽之險復愈此凝真觀前加震驚十二峯巒羅蕭鳳

船過神鴉管迎送吒灘直接歸州灘自昔號為人鮓甕

黃牛廟睇黃鶴樓雲夢澤通鸚鵡洲赤壁臨臯纔咫尺

琵琶亭下蘆花秋匡廬雄尊五老立大孤小孤遙旅揖

彭郎磯前即馬當九華采石青戢戢鍾阜龍蟠奠九州

石頭虎踞當長流北固紆徐鏤甕堅金焦兩點猶浮漚

春申墓陰鵝鼻嘴角力狂瀾障厓趾煙水瀰漫豁海門

亘古朝宗從此始彼美畫師儒林英天機所到雙眼明

拂拭素繭掃玄瀋閉戶不聞風雨聲老夫平生山水癖

白首卧遊遊歷歷客持卷軸請我觀題詩聊復識疇昔

過太湖

揚州巨浸曰震澤厥功底定存禹跡世傳三萬六千頃
周五百里渺無極誰散羣峯亂碧流七十二點青螺浮
吐吞中吳者八九勢灑直與東溟侔魚市微茫漁屋小
酒旗搖曳楓林老岸花汀草晚離離雲氣嵐光春悄悄
吳越英雄今幾年鴟夷長往終不還龍虎戰爭歸一統
蛟鼉掀舞藏深淵南風破浪船頭響王事有期誠鞅掌


問程已過馬跡山落帆轉入沙掌港萬雉金城路尚遙
篙師宵征寧憚勞後月朔旦無多日玉筍聯班要早朝
過臙脂河

臙脂山頭平劈破一道長溪此中過匠人十萬斧鑿功
疑是六丁天所課危橋挂空若生成石壁千仞開錦屏
兩邊羅列八九里吳艤蜀舩西東征四方職貢紛聯絡
揚子大江風浪惡九重宵旰勞聖心特敕有司亟興作
左通銀墅右沙河滔滔湛湛皆恩波可憐伊昔六代時

無有及斯竟若何老臣挾書朝帝所拭目竒觀喜欲舞
稽首作歌頌神武磨厓鐫刻照萬古



御選明詩卷三十九



總校官庶吉士臣侍朝

校對官檢討臣蕭九成

騰錄舉人臣傅環芳